

欽
定
全
唐
文

欽定全唐文卷九百七十二目錄

闕名 十三

請優經學出身選任奏

准勅修凌煙閣奏

諫親送葬奏

請定刺史選舉軍州判官條例奏

請修奉列聖陵寢奏

請加吳山封號奏

覆奏程遜等陳時務奏

請改廟諱偏旁奏

請改定枉法贓罪奏

請定朝官除任月限奏

議臣寮居喪終制除授奏

請更定朝班奏

請定内外官吏對見條例奏

覆冊四廟奏

請准舊式賜食儀制奏

行朝起居依在京事體奏

請復舊制廊下賜食奏

進苑恕策奏

進竇溫顏策奏

分別常參官奏

請改正漏刻奏

遵勅改定漏刻奏

進盧燦策奏

進李祥疏奏

請准段禹修齋壇屋宇奏

請詳定明宗朝勅制奏

請建慶昌宮奏

乞御史照舊例分判事宜奏

日食救護奏

請定公主出降儀奏

請定唐廟制度奏

請定官品奏

點檢起居官奏

據乞賜院額奏

請定僕射入朝儀注奏

欽定全唐文卷九百七十二

闕名 十三

請優經學出身選任奏

應順元年閏正月
中書門下

准天成二年十二月詔曰長定格應文學出身人一任三
考許入下縣令下州縣錄事參軍亦入中下州錄事參軍
兩任四考許入中下縣令中州錄事參軍兩任五考許入
中縣令上州錄事參軍兩任六考許入上縣令及繁州錄
事參軍凡爲進取皆有因依或少年便授好官或暮齒不
離卑任況孤貧舉士纔年四十始得經學及第八年合選

方受一官於初任之中多不成三考第二選漸向蹉跎有
一生終不至令錄者若無改革何以發揚自此經學出身
請一任兩考許入中下縣令下州錄事參軍

准勅修凌煙閣奏

應順元年閏
正月集賢院

准勅書修創凌煙閣尋奉詔問閣高下等級謹按凌煙閣
都長安時在西內三清殿側畫像皆北面閣有中隔隔內
北面寫功高宰輔南面寫功高諸侯王隔外面次第圖畫
功臣題贊自西京板蕩四十餘年舊日主掌官吏及畫像
工人並已淪喪集賢院所管寫真官畫真官人數不少都

洛後廢職今將起閣望先定佐命功臣人數請下翰林院
豫令寫真本及下將作監興功次序間架修建

諫親送葬奏

應順元年二月山陵使

大行山陵四月二十七日掩元宮以御札皇帝親奉靈駕
至園陵有司量事供備臣等伏見累朝故事人君無親送
葬之儀蓋承繼事大非薄於送終

請定刺史選舉軍州判官條例奏

清泰元年七月
月中書門下

自今年二月後諸州奏軍州判官九人行之擬新詳定勅
文慮在外未知詔軍事判官宜令本州刺史自選擇舉奏

初且除本職未得與官或與刺史連任相隨顯有勞能許
本刺史以聞量與獎賞仍不許橫有奏薦其三月後九人
且與施行

請修奉列聖陵寢奏

清泰元年十一月宗正寺

御史臺轉報百司各抄六典令式內本司事舉行職典宗
廟陵園列聖陵寢多在關西梁季爲賊臣盜發同光初曾
差供奉官李說工部郎中李途往關西巡陵祭告屬朝廷
有故不行明宗天成初差丞李郁檢較又長興四年詔掩
閉無主墳墓况列聖陵寢伏遇中興雖有修奉之言而無

掩閉之實乞差官檢討修奉置陵令一員應屬陵之四封各乞寺司管係

請加吳山封號奏

清泰元年

天寶十載正月封吳山爲成德公與沂山會稽醫無閭同制封公至德二年十二月改吳山爲嶽祠享官屬視五嶽今國家以靈應告祥宜示殊等

覆奏程遜等陳時務奏

清泰元年
中書門下

翰林學士程遜學士和凝張礪等上十三事其一前代帝王親觀風俗訊民利病其後不暇親行亦遣使巡行風俗

唐朝於十道置採訪使一員請如舊制亦冀民病蘇舒其
二天成已來久不括田自水旱累年民戶疾苦不均今歲
夏秋或稔於常歲請行檢括庶獲均輸其三中原邊上率
多閒田可令近下軍都興起屯田舊時銅冶鐵冶亦令軍
人興置不費於民其四人君求理欲廣視聽須羣臣上言
然則人才有短長智畧有能否其於聽用之間乞留睿鑒
伏恐失人其五朝野官吏人數衆多若不行黜陟之科何
以察其能否望准考課令凡中外官歲終較考以行進退
其六古人得位相讓所冀不掩賢能得其髦俊請依建中

故事羣官受命後舉人自代其七治道旣知損益務實去
華伏見自中興以來或於邊境權立州縣名目戶口不多
虛張吏員枉費祿食其權置名目望一切停省以賑邊軍
臣伏見徐宿州管內有泗濱院徐山院市邱院白土務所
管人戶共數千家請罷廢名額其戶稅請還州縣其八請
止游惰勸農桑減冗食之員停不急之務其九君上置諫
諍之官此期聞過況聞官給諫紙虛佇讜言時政有所不
便請諫官陳論詔書有所依違請給事中封駁其十國朝
承平時諸監鑄錢不輟尚不能給今國家所鑄絕少而市

人銷錢貴賣銅器累行止絕尚未知禁伏乞嚴下條法其銅除鏡鞍轡腰帶外不許市賣銅器犯者以贓論其十一沿邊鎮戍請明斥堠習戰陣謹烽候令夷狄知懼戰必有功其十二每年給散蠶鹽不敷斤兩雜之以硝土請給散之時命清強官止絕其十三伏聞關西河東人民饑饉殍殍者多其城市鄉村積粟之家望令官司通指姓名俾令出糶以濟飢民中書門下覆奏程遜等十三事其置採訪使難擇公清之吏却生僥倖之門問疾苦則未能勞供須則轉費况刺史廉使自合訪求不勞別置其累年水旱欲

與檢田以均勞逸今年夏苗已多災旱秋稼今未及時請
下三司可否聞奏其屯田治務興造之初所費不少今國
力未辦可俟佗時其受官舉代劉鼎近已上聞其餘九件
並可施行擇良善爲心腹羣官書考併省州縣止游惰勸
耕桑諫官論事給事封奏斷用銅器邊城習武備差官散
蠶鹽均糶以濟飢民等事

請改廟諱偏旁奏

清泰二年五
月中書門下

准天成元年正月十六日勅本朝列聖及四廟諱近日中
外表疏偏旁文字皆闕點畫凡當出諱止避正呼儻迴避

於偏旁則虧闕於文字宜從樸素庶便公私凡廟諱但迴避正文其偏旁文字不在減少點畫今定州節度使楊壇檀州金壇縣等名酌情制義並請改之

請改定枉法贓罪奏

清泰二年五月
中書門下

刺史位列公侯縣令爲人父母祇合倍加乳哺豈合自致瘡痍一昨張宗裔胥吏訟論合當極典法司據律罪止徒流向來此法極嚴纔可存其軀命卽一二十年不復還鄉却緣近日赦宥稍頻遷易頗數致其兇物不顧嚴刑臣竊惟立法稍嚴則人不敢犯其見行法律望下所司再加詳

酌

請定朝官除任月限奏

清泰二年八月中書門下

前大卿監五品升朝官西班牙將軍皆在任許滿二十五月如衝替已經二十月卽別任用少卿監舊例三任四任方入大卿監五品三任四任方入少卿監今後並祇三任逐任須月限滿無殿責者便入此官西班牙將軍罷任一年許求官舊例三任四任方入大將軍今祇無殿責或曾任金吾將街使藩鎮刺史特勅並不拘此例諸道除兩使判官外書記以下任自辟請應朝官除外任罷任後一年方許

陳乞諸道賓席未曾升朝者若官兼三院御史卽除中下
縣令兼大夫中丞祕書少監郎中員外郎與清資初任升
朝官檢校官至尚書常侍祕書監庶子升朝便與少卿監
諸州防禦團練判推官並請本州奏辟中書不更除授應
出選門官帶三院御史供奉裏行及省銜罷任後周年許
陳乞諸州別駕不除令錄仍守本官月限得替後一年許
陳乞長史司馬因攝奏正未有官者送名

議臣寮居喪終制除授奏

清泰二年十
月中書門下

奉長興二年四月五日勅朝臣居喪終制委御史臺具名

申奏諸道幕府職事除喪後宜行恩命州縣官纔授官及到任一考前丁憂服闋並與除授依長定格自有節文應州縣官新授及到任一考前丁憂服闋准格取文解南曹磨勘申中書門下當與除授不得經堂陳狀

請更定朝班奏

清泰二年十一月御史臺

今月二日班入遇雨移班廊下知班臺吏董瑾引僕射在中丞三院御史以下僕射詰問董瑾稱准常例臺司刺都省請簡討舊儀都省稱國朝以端揆之重師長百僚雖在列司皆爲統屬且左右僕射常朝不在中丞之下赴宴廊

飧並在中丞之上況中丞有公參之理避路之儀詳其道
理自有等降臺司又堅稱李琪盧質任僕射日班亦如此
又引通事舍人在一品班上尋申中書門下奉宰臣判令
廊下使重定班位廊下使言今後遇雨移班廊下欲請依
殿前埽位次第二品在三品前一品後若中丞大夫俱置
卽大夫在中丞前其西班牙准此謹聞

請定內外官吏對見條例奏

清泰三年三月

內外官吏對見例應諸州差判官軍將貢奉到闕無例朝
見以名銜奏放門見賜酒食得迴詔進膀子放門辭臣今

後欲祇令朝見餘依舊規應諸道兩使判官推官巡官無
例中謝奏過放謝辭如得替歸京無例朝見臣欲今後除
兩使判官許中謝門辭其書記已下新除授及得替並依
舊規應文武朝官除授文五品武四品以上並中謝以下
無例對謝以天成四年正月勅凡升朝官新授並中謝欲
准此例應諸道節度使差判官軍將進奉到闕朝見得迴
詔下膀子奏過令門辭應諸道都押衙馬步都虞候鎮將
得替到京無例見或在京授任無例中謝進膀子放謝辭
應諸道商稅鹽麴諸色務官在京差補亦放謝辭得替歸

京亦無例見在京商稅鹽麴兩軍巡使卽許中謝應新除
令錄並中謝次日放門辭兼有只宣誠勵應文武兩班差
弔祭使及告廟祠祭祇於正衙辭見不赴內殿諸道差進
奏官到闕得見後請假得替進膀子放門辭已前六件望
准舊例施行

覆冊四廟奏

天福二年三月尚書省

臣等今月十三日再於尚書省集百官詳議夫王者祖武
宗文郊天祀地故有追崇之典以申配饗之儀竊詳太常
禮院議狀准立七廟四廟卽並通其理其他所論並皆勿

取七廟者按禮記王制云天子七廟三昭三穆與太祖之廟而七鄭元注云此周制也詳其禮經卽是周家七廟之定數四廟者謂高曾祖禰四世也按周本紀及禮記大傳皆云武王卽位追王太王王季文王以后稷爲堯稷官故追尊爲太祖此卽周武王初有天下追尊四廟之明文也故自漢魏以降迄於周隋創業之君追謚不過四世約周制也此禮行之已久事在不疑今參詳都省前議狀請立四廟外別引始祖取裁未爲定議續准勅據御史中丞張昭遠奏請創立四廟之外無別封始祖之文備引古今細

詳沿革合前王之茂典是歷代之通規況國家禮樂刑名
皆約唐典宗廟之制須據舊章請依唐朝追尊獻祖宣皇
帝懿祖光皇帝太祖景皇帝代祖元皇帝故事追尊四廟
爲定臣等考詳典禮上奉聖明雖共竭於懇誠實倍慙於
淺近

請准舊式賜食儀制奏

天福二年三月御史臺

唐朝令式南衙常參官文武百寮每日朝退於廊下賜食
謂之堂食自唐末亂離堂食漸廢仍於入閣起居日賜食
每入閣禮畢閣門宣放仗羣臣俱拜謂之謝食至僞主清

泰元年中入閣禮畢更差中使至正衙門口宣賜食百官立班重謝此則交失唐朝賜食之意於禮實爲太煩臣恐因循漸失根本起今後入閣賜食望不差中使口宣准唐明宗朝事例處分

行朝起居依在京事體奏

天福二年四月御史臺

又武百寮每五日一度內殿起居在京城時百官於朝堂幕次自文明殿門入穿文明殿庭入東上閣門至天福殿序班今隨駕百官自到行朝每遇起居日於幕次東出升龍門與諸色人排肩雜進自外繚繞方入內門臣竊見升

龍門外庭宇不寬人徒大集或是諸司掌事或是諸道使臣方集貢輸不可止約若令與衣冠雜進朝士並趨則恐有壞天官見輕朝序權時之義事理難安起今後每遇百官赴內殿起居口請依在京事體百官於幕次自正衙門入東出橫門既協京國常儀兼在行朝便穩

請復舊制廊下賜食奏

天福二年四月御史臺

文武百寮每月朔望入閣禮畢賜廊下食在京時祇於朝堂幕次兩廊下今在行朝於正衙門外權爲幕次房廊湫隘間架絕少伏恐五月一日朝會禮畢准例賜食卽於幕

次難爲排比伏見唐明宗時兩省官於文明殿前廊下賜食今未審每遇入閣日權於正衙門兩廊下排比賜食爲復別有處分者

進苑恕策奏

天福二年十月詳定院

前洛州雞澤縣主簿苑恕進策五件可行者有二其一云伏見諸道行遣公事皆有前後通規定知後所繇置遞符脚力每遇緩急嘗遣往來既有嚴程孰敢慢事近日州使多差牽攏散從承符步探官等下縣追督公事始發一替專人又致續催使者事則一件兩件使乃五人七人非唯

剝削蒸黎實爲撓煩縣邑及官吏無暇區分庶事唯當祇奉專人如此弊訛特望條貫若令佐稍虧職分或後公期顯有憲章請行法典其二曰自前兩稅徵賦已立三限條流官員懼殿罰之威節級畏科懲之罪苟非水旱敢怠區分未嘗有不了之州何處是不前之縣臣今覩諸道省限未滿州使先追仍勒官員部領胥徒云與倉庫會探務行誅剝因作瘡痍全無軫恤之心但恣貪求之意外邑所繇等不免牽費非理盤纏例總破家皆聞逃役自今之後伏乞只憑倉庫納數點算便卽委知仍取縣司申聞勘會以

明同異若實違省司期限請依常典指揮會探之名特乞
停寢者臣等參詳苑恕所陳事件要絕煩苛當務息民以
裨求理誠爲允當望賜施行

進寶溫顏策奏

天福二年十月詳定院

前隰州蒲縣令寶溫顏進策一十一件可行者有二其一
曰伏見所在縣令有差配百姓紙筆及課錢戶者朝廷付
以宰字貴要撫綏支給料錢合專慎守逐日紙筆之用所
費不多隨處等力之名皆有定數多是擅放甚爲貪污特
望降以嚴條除其宿弊伏慮州縣官逐月所給正俸皆無

見錢使府給配之時皆是虛頭計算伏請州縣官所給料
錢雜物准折一依逐處時估者臣等參詳凡關課戶皆是
強名縣宰將治凋疲不合別生差配據茲條件請賜改更
所給料錢難議條理

分別常參官奏

天福二年十一月
中書門下

准唐貞元二年九月五日勅文官充翰林學士及皇太子
諸王侍讀武官充禁軍職事並不常朝參其在三館等諸
職事者並朝參訖各歸所務者自累朝以來文武在內廷
充職兼判三司或帶職額及六軍判官等例不赴常朝元

無正勅准近勅文武職事官未升朝者按舊制並赴朔望
朝參其翰林學士侍讀三館諸職事望准元勅處分其在
內廷諸司使等每受正官之時來赴正衙謝後不赴常朝
大朝會不離禁廷位次三次職官免常朝唯赴大朝會其
京司未升朝官員祇赴朔望朝參帶諸司職事者不在此
例文官除端明殿翰林學士樞密院學士中書省知制誥
外有兼官兼職者仍各發遣本司供事

請改正漏刻奏

天福三年二月
司天臺

漏刻經云漏刻之制起自軒轅所以上揆天時下著人事

是故日行有南北晷漏有長短以黃道去極之度而求漏刻日移之變夫中星晝夜一百刻分爲十二時每時有八刻三分之一假令符天以六十分爲一刻一時有八刻二十分四刻十分爲正前四刻十分爲正後二十分中必爲時正上古以來皆依此法自唐室將季黃巢犯京既失舊經漏刻無准伏以見行漏刻自午初四刻元稱已時已入未時猶打午正若不改更終成錯誤今欲每時初打一刻至四刻後正時正牌打八刻終一時後一時却從初起卽上同往古下驗將來

遵勅改定漏刻奏

天福三年二月
司天臺

臣等據諸家厯數及太霄論漏刻等經皆以晝夜百刻分爲十二時每時有八刻三分之一凡一時以打一刻起於時初八刻終於時正近取到水秤較驗方知見行漏刻差誤假令以午時爲例從午時五刻上行作午時一刻侵至未時四刻始滿八刻方終午時此則午未兩時中各取半合爲一時也自日出後至日入以來時刻皆如此例相侵伏乞改正從時初打一刻至四刻後進正牌八刻終爲一時後時却從初起時辰自正晷漏無差

進盧燦策奏

天福三年三月詳定院

前守洪洞縣主簿盧燦進策云伏以刑獄至重朝廷所難
尚書省分職六司天下謂之會府且諸道決獄若關人命
卽刑部不合不知欲請州府凡決大辟罪人請逐季具有
無申報刑部仍具錄案款事節并本判官馬部都虞候司
法參軍法直官馬部司判官名銜申聞所貴或有案內情
繇不圓刑部可行覆勘如此則天下遵守法律不敢輕議
刑書非唯免有銜冤抑亦勸其立政者臣等參詳伏以人
命至重而國法須精雖載舊章更宜條理誠爲允當望賜

施行

進李祥疏奏

天福三年
三月宰臣

李祥才光鳳閣志奉龍圖聰明有作誥之方名器無假人之理以茲留意爰具上章乃是大綱且非小善旣叶聖人之教可嘉君子之言所奏節度刺史州衙前職員等事望賜施行

請准段畧修齋壇屋宇奏

天福三年四月
詳定院

太常博士段畧進封事云臣竊見雒京四面所有祠祭諸壇等自近年以來相次官員祭告不住芟薙掃除漸似低

平久虧增飾今乞下太常寺牒河南雒陽兩縣應有管係壇所方以農務未興之時各勒逐近量差三十人功添補修泥須及元格尺丈高濶其齋宮慮有經費據難修營稍候秋登亦望條理自然百靈允集萬福攸歸臣等參詳大凡祀祭事在敬恭惟於齋壇最宜崇飾

請詳定明宗朝勅制奏

天福三年六月
月中書門下

伏覩天福元年十月勅節文唐明宗朝勅命法制仰所在遵行不得更易今諸司每有公事見執清泰元年十月十四日編勅施行稱唐明宗朝勅除編集外盡已封鎖不行

臣等商量望差官將編集及封鎖前後勅文並再詳定其經文可行條件別錄聞奏施行

請建慶昌宮奏

天福四年二月
月中書門下

陛下應天順人握圖御宇電遶虹流之地既煥禎符出潛離隱之鄉宜光稱謂其太原潛龍莊望建爲慶昌宮使相望鄉改爲龍飛鄉都尉里望改爲神光里

乞御史照舊例分判事宜奏

天福四年三月
御史臺

按六典侍御史掌糾舉百僚推鞠獄訟居上者判臺知公解雜事次知西推贓贖三司受事次知東推理匭伏乞今

後准故事施行

日食救護奏

天福四年六月司天臺

七月一日太陽有虧缺於北極於東復於南未盈而沒太常禮官詳舊制曰有變天子素服避殿太史以所司救日於社陳五兵五鼓麾東戟南矛西弩北盾中央置鼓服從其位百職廢務素服守司重列於庭每等異位向日而立明復而罷今所司法物咸不能具去歲正旦日有食之唯謹藏兵仗皇帝避正殿尚素食百官守司而已

請定公主出降儀奏

天福四年八月
中書省

太常禮院定來歲長安公主出降儀太僕寺供厭翟二馬車殿中省備圓方偏扇各十六行障三坐障二繖一大扇一團大扇二今車障傘扇是同光年皇后法物欲雅飾牙使厭翟之車后以四馬權去二馬用之

請定唐廟制度奏

天福四年十一月太常禮院

唐廟制度請以至德宮正殿隔爲五室室三分之南去地四尺以石爲埆中容二主廟之南一屋三門門戟二十四東西一屋一門門無榮戟四仲之祭一羊一豕如其中祠幣帛牲牢之類光祿主之祠祝之文不進不署神廚之具

鴻臚督之五帝五后凡十主未遷者六未立者四未諡者三高祖太宗與其后暨莊宗凡六主在清化里之寢宮祭前一日以殿中繖扇二十迎置新廟以行饗禮閔帝莊宗明宗二后及魯國孔夫人神主四座請修製祔廟及三后請定諡法

請定官品奏

天福七年五月
中書門下

有司檢尋長興四年八月二十一日勅準官品令侍中中書令正三品按會要大厯二年十一月升爲正二品左右常侍從三品按會要廣德二年五月升爲正三品門下中

書侍郎正四品大歷二年十一月升爲正三品諫議大夫
正五品按續會要會昌二年十二月升爲正四品以備中
書門下四品之闕御史大夫從三品會昌二年十二月升
爲正三品御史中丞正五品亦與大夫同時升爲正四品

點檢起居官奏

天福七年五
月中書門下

時屬炎蒸事宜簡省應五日百官起居卽令押班宰臣一
員押百官班其轉對官兩員封事付閣門使引進本官起
居後隨百寮退不用別出謝恩其文武內外官寮乞假寧
親搬家及婚葬病損並門見門辭諸道進奉物等不用殿

前排列引進使引至殿前奏云某等進奉奏訖其進奉物
便出其進奉專使朝見日班首一人致詞都附起居州刺
史并行軍副使諸道馬步軍都指揮使以下差人到闕並
門見門辭州縣官謝恩日甲頭一人都致詞不用逐人告
官其供奉官殿直等如是當直及於合殿前排列者卽入
起居如不當直排列者不用每日起居委宣徽院專切點
檢常須整齊

據乞賜院額奏

開運二年
六月定州

據郎山招收指揮使孫方簡狀當山有僧院地居山谷道

扼鄉閭自蕃戎騷動以來邊界驚移之後多聚強壯自辦
戈矛每遇賊軍皆獲勝捷其郎山爲易州之中路滿縣之
鄰封通此往來最爲要害乞賜院額者

請定僕射入朝儀注奏

開運二年八月御史臺

宰相和凝新除右僕射入朝就列儀注責得臺吏喬得威
狀稱新除僕射正衙朝謝後次日中丞率三院御史到僕
射廳公參相次文武百官公參趨朝時不序班入在中丞
之前兼舊例除拜御史大夫趨朝退出在兩省之前僕射
出在大夫之前近年以來入朝祇在中丞之前朝退僕射

出却在兩省之後銀臺司遂檢唐朝舊儀伏見元和七年
二月七日勅所定僕射趨朝出入儀注甚重今後欲請常
朝序班候御史中丞羣官先入以次東宮保傅入次兩省
入次僕射入及朝退僕射先出以次兩省官出東宮保傅
出次御史中丞百官出

欽定全唐文卷九百七十三目錄

闕名 十四

請修制配享獻享禮奏

條陳減選奏

請朝拜睿陵奏

請降階迎四廟冊案奏

請勘尋選人失墜告牒事理奏

請禁業主牙人陵弱商賈奏

請孟冬祫祭奏

迎太廟神主儀注奏

量定郊祀璧幣制度奏

請祀郊廟用祝版奏

請定起居舍人朝班先後奏

請刪定法書奏

條陳考課事例奏

請定文武官朝參不到罰例奏

欽定全唐文卷九百七十三

闕名 十四

請修制配享獻享禮奏

乾祐元年六月太常禮院

准天福十二年六月中勅追尊六廟當司尋各牒所司請
排比法物修制冊寶并袞龍服通天冠絳紗袍鎮珪等所
司修制並無次第者伏緣當司勘造逐年四季祠祭畫日
內正月上辛祈穀四月孟夏雩祭及夏至九月季秋大享
明堂十一月冬至禋祀昊天上帝夏至祀皇地祇十月孟
冬神州地祇皆以祀前二日准禮例奏告太廟一室配座

并四五月及臘饗於太廟伏以國之大事在祀與戎晝日無配座之儀宗廟闕薦饗之禮今詳典墳有虧禮敬伏乞再下所司申請修制

條陳減選奏

乾祐二年十二月
月中書門下

准天福八年四月一日勅條舉前後勅文內一件准天福五年十月二十七日勅應州縣官書得十六考敘階至朝散大夫者并歷任內曾升朝及兩使判官者准元勅一選集選期旣近理減尤難不得援常選人例妄乞減選每一任無遺闕者候再除官別與加恩其曾任節度觀察推官

巡官防禦團練軍事判官并諸出選門官等如卻授令錄者並依見任官選數赴集若在任有考課准格合減選者並與理減除此外今任合七選集者特與減一選八選已上與減兩選仍並合格日取解赴所司磨勘無違礙者卽錄名送中書

請朝拜睿陵奏

廣順元年正月宗正寺

漢朝諸陵二仲差官朝拜今鼎命歸周不合管係伏准敕書睿陵宮人職員時日薦享如舊二仲合差官朝拜

請降階迎四廟冊案奏

廣順元年四月
月中書門下

太常禮院申七月一日皇帝御崇元殿命使奉冊四廟以舊儀服袞冕卽座太尉引冊案入皇帝降座引立於御座前南向中書令奉冊案進皇帝搢珪捧授冊使使跪受轉授昇冊官其進寶授寶儀如冊案恭以興王之始稽古爲先四方見尊祖之心萬代傳敬親之道臣等參詳至時請皇帝降階

請勘尋選人失墜告牒事理奏

廣順元年六月
中書門下

得司勳郎中許遜申權主判吏部格式選人皆稱值去年十一月內失墜告牒雖尋舊式有例檢行竊緣官員上任

之日只憑告勅籤符罷秩之後卽藉解縣厯子旣失官牒
得以檢其勅甲若無解縣難知真僞欲請今後若無解縣
厯子考牒者候牒本道州縣勘尋有何殿最候迴文與陳
狀官員事理同卽依牒申銓取保再給憑縣貴無踰濫之
人免有徼求之倖

請禁業主牙人陵弱商賈奏

廣順二年十
二月開封府

商賈及諸色人等訴稱被牙人店主人引領百姓賒買財
貨違限不還其價亦有將物去便與牙人設計公然隱沒
又莊宅牙人亦多與有物業人通情重疊將店宅立契典

當或虛指別人產業或浮造屋舍僞稱祖父所置更有卑幼骨肉不問家長衷私典賣及將倚當取債或是骨肉物業自己不合有分倚强凌弱公行典賣牙人錢主通同蒙昧致有爭訟起今後欲乞明降指揮應有諸色牙人店主引致買賣並須錢物交相分付或還錢未足仰牙人店主明立期限勒定文字遞相委保如數內有人前卻及違限別無抵當便仰連署契人同力填還如諸色牙行人內有貧窮無信行者恐已後誤業卽許衆狀集出如是客旅自與人商量交易其店主牙行人並不得邀難遮占稱須依

行店事例引致如有此色人亦加深罪其有典質倚當物業仰官牙人業主及四鄰人同署文契委不是當將物業已經別處重疊倚當及虛指他人物業印稅之時於稅務內納契日一本務司點檢須有官牙人鄰人押署處及委不是重疊倚當錢物方得與印如違犯應關連人並行科斷仍徵還錢物如業主別無抵當只仰同署契牙保鄰人均分代納如是卑幼不問家長便將物業典賣倚當或雖是骨肉物業自己不合有輒敢典賣倚當者所犯人重行科斷其牙人錢主並當深罪所有物業請准格律指揮如

有典賣莊宅准例房親鄰人合得承當若是親鄰不娶及
著價不及方得別處商量和合交易只不得虛擡價例蒙
昧公私如有發覺一任親鄰論理勘責不虛業主牙保人
並當科斷仍改正物業或親戚實自不便承買妄有遮吝
阻滯交易者亦當深罪

請孟冬祫祭奏

廣順三年七月太常禮院

祭禮宗廟之祀三年一祫以孟冬五年一禘以孟夏所以
別尊卑審昭穆也四時之祭薦其常事故禘祫之月則不
行時饗恭惟追尊四廟經今三年准禮合改十月孟冬薦

享爲禘

迎太廟神主儀注奏

廣順三年九月禮儀使

太廟神主將至前一日儀仗出城掌次於西御莊東北設神主行廟幄幕面南其日放朝羣臣早出西門皇帝常服出城詣行宮羣臣起居畢就次神主將至羣臣班定皇帝立於班前神主至太常卿請皇帝再拜羣臣俱拜神主就行廟幄幕坐設常饌羣臣班於神幄前侍中就次請皇帝謁神主既至羣臣再拜皇帝進酒畢再拜羣臣俱拜皇帝還幄羣臣先赴太廟門外立班俟皇帝至起居俟神主至

羣臣班於廟門外皇帝立於班前太常卿請皇帝再拜羣臣俱拜皇帝還幄羣臣就次宮闈令安神主於本室訖羣臣班於廟庭太常卿請皇帝於四室奠饗逐室皇帝再拜羣臣俱拜四室祔饗畢皇帝還宮前件儀注望付中書門下宣下

量定郊祀璧幣制度奏

廣順三年九月禮儀使

郊祀珪璧制度准禮祀上帝以蒼璧祀地祇以黃琮祀五帝以珪璋琥璜其玉各依本方正色祀日月以珪璋祀神州以兩珪有邸其用幣天以蒼色地以黃色配帝以白色

日月五帝各從本方之色皆長一丈八尺其珪璧之狀璧
圓而琮八方珪上銳而下方半珪曰璋琥爲虎形半璧曰
璜其珪璧琮璜皆長一尺二寸四珪有邸邸本也珪著於
璧而四出也日月星辰以珪璧五寸前件珪璧雖有圖樣
而長短之說或殊按唐開元中元宗詔曰禮神以玉取其
精潔比來用珉不可行也如或以玉難辦寧小其制度以
取其真今郊廟所修珪璧量玉大小不必皆從古制伏請
下所司修製

請祀郊廟用祝版奏

廣順三年九月禮儀使

古者文字皆書於冊而有長短之差魏晉郊廟祝文書於冊唐初悉用祝版惟陵廟用玉爲冊元宗親祭郊廟用玉爲冊德宗朝博士陸淳議准禮用祝版祭已燔之可其議貞元六年親祭又用竹冊當司准開元禮并用祝版梁朝依禮行之至明宗郊天又用竹冊今詳酌禮例祝版爲宜

請定起居舍人朝班先後奏

廣順三年十一月
中書省

新除起居舍人邊珣任徹其邊珣已謝任徹奉使未回任徹自左補闕除授邊珣自右補闕除授任徹舊官已在邊珣之上今任徹自勅頭近日同制授官多以先謝爲上伏

慮任徹使回行立班次難定

請刪定法書奏

顯德四年五
月中書門下

准宣法書行用多時文意古質條目繁細使人難會兼前
後勅格互換重疊亦難詳定宜令中書門下並重刪定務
從節要所貴天下易爲詳究者伏以刑法者御人之銜勒
救弊之斧斤故鞭扑不可一日弛之於家刑法不可一日
廢之於國雖堯舜淳古之代亦不能捨此而致理矣今奉
制旨刪定律令有以見聖君欽恤明罰勅法之意也竊以
律令之書政理之本經聖賢之損益爲古今之章程歷代

以來謂之彛典今朝廷之所行用者一十二卷律疏三十卷式二十卷令三十卷開成格一十卷大中統類一十二卷後唐以來至漢末編勅三十二卷及皇朝制勅等折獄定刑無出於此律令則文辭古質看覽者難以詳明格勅則條目繁多檢閱者或有疑誤加以邊遠之地貪猾之徒緣此爲姦寢以成弊方屬盛明之運宜伸畫一之規所冀民不陷刑吏知所守臣等商量望准聖旨施行仍差侍御史知雜事張湜太子右庶子劇可久殿中侍御史帥汀職方郎中鄧守中倉部郎中王瑩司封員外郎賈玘太常博

士趙礪國子博士李光贊大理正蘇曉太子中允王仲等
一十人編集新格勒成部帙律令之有難解者就文訓釋
格勅之有繁雜者隨事刪除止要諸理省文兼且直書易
會其中有輕重未當便於古而不便於今矛盾相違可於
此而不可於彼盡宜改正無或牽拘候編集畢日委御史
臺尚書省四品以上及兩省五品以上官參詳可否送中
書門下議定奏取進止

條陳考課事例奏

顯德五年閏
七月考功

奏新勅起今年正月一日後授官並以三周年爲月限閏

月不在其內者當司所書較內外六品下赴選官員考第
今後以一周年較成一考如欠日不在計限滿三周年較
成三考如考滿後未有替人在任更一周年與成第四考
如欠日不在計限兼逐年須具到任年月日自上以來課
績功過第二考須具經考後課績不得重疊計功其未考
須具得替年月日比類升降自今年正月一日以前授官
到任者欲准格例三十個月書較三考今年正月一日後
來授官到任者准新勅三周年爲月限每一周年書較一
考閏月不在其內所有諸道州府較考申發考帳及當司

較奏各依前後格勅施行應諸司諸色流內出身人等准
格並須待附申考近年不經奏考便至參選頗啟倖門應
在司見役人等自今後逐年起六月初一日後正身於所
司投狀請申較勞考省司據狀却牒本司勘會補奏年月
日勅甲頭姓名見掌案分公事牒報省司將元狀檢勘同
卽與准例申較仍自此後須逐年九月以前較奏了畢不
在更與隔年併書之限其考牒本無綾紙書寫勅例今後
每年奏下逐人給省牒一紙使大張紙書不在使綾紙及
併年都給限據省較勅之日有公事在外差出不虛卽本

司雜事須具在職功過及出外事繇牒報考功不得有妨
逐年書較如不與申牒其雜事令史量情科決仍殿一選
如無故自不經省投狀請奏較不在論訴之限者當司緣
新勅促期限慮恐較考遲違今後應合較考人請起自五
月一日正身投狀限十日畢至七月三十日以前較奏了
畢餘依元格施行

請定文武官朝參不到罰例奏

顯德五年閏七月御史臺

文武百官每日赴朝參不到如是常朝不到於本官料錢
上每貫罰錢十五文如是內殿起居入閣行香出城衆集

及非時慶賀御殿關行參不到並是倍罰臺司先榜幕次

曉示本官限三日外卽牒三司剋折如有故曾陳牒卽將
須由呈驗又十六愆條准元和二年十二月內御史臺奏
文武常參官准乾元元年三月勅如有朝堂相弔慰相跪
拜待漏行立失序談笑誼譁入衙內執笏不端行立遲慢
至班列行立不正趨拜失儀拜跪不俯伏舒脚穿班伏出
門不卽就班無故離位廊下食行坐失儀拜起無度抵夜
退朝不從正衙門出非公事入中書每犯者奪一月俸今
商量比舊條各減一半如所由指揮尚或抵拒卽准舊例

錄奏貶降

欽定全唐文卷九百七十四目錄

闕名 十五

請立皇太子疏

請節哀親政疏

請增添聞奏條令疏

請罰到任遲延疏

請釐正託故不之任疏

請置祇候屋宇疏

請推問臨決稱冤疏

請設官講明經義疏

請以壽星配社兩京立萬壽殿狀

奏兩監學生員額狀

請令常參官舉人自代及縣令犯罪坐舉主狀

奏得古釜狀

奏姚中立高錯考試狀

奏鄧琬等禁繫狀

奏酌量增減諸司食利錢狀

條奏鹽法狀

立二王三恪狀

覆論周知微奏狀

奏忌辰前後日不坐朝狀

奏請避諱狀

奏李自倫孝義狀

奏定高祖郊壇配坐狀

請量留太谷令李殷狀

張嗣宗不受代狀

除宰相劉昫兼判三司擬狀

投宰相牋

欽定全唐文卷九百七十四

闕名 十五

請立皇太子疏

寶應二年五月宰臣

伏見儲貳未立明兩虛位累有陳請愚誠不從陛下以郊
壘多虞羌戎侵軼抑茲大典姑務安邊誠聖主憂勤謙讓
之心非國家固本久遠之計易曰重明以麗乎正乃化成
天下書曰一人元良萬邦以貞謹按歷代哲王守邦建國
未有不先定冢嗣以叶羣情然後修禮文緝刑政於是諸
侯以秩進戎狄以義敘七鬯以時主監撫以事明宗祀之

本不可斲闕今大盜初滅先零猖狂時號艱虞人懷底定而守嫡不建繼體未孚天下喁喁實有所望陛下固辭未免億兆搖心伏願遠圖百代之謀俯遂羣臣之請必冀四夷向化萬國歸誠

請節哀親政疏

大歷元年
五月宰臣

伏以華陽公主輟朝又當夏至節假臣等趨事向隔旬時惶駭失圖瞻跼若歲仰惟公主夙成神悟仁眷特鍾嘗禱必親已承減膳幽明遽間倍軫慈衷臣等微誠無由感達伏惟陛下守累聖之公器御羣生之重畜夷百戰之艱患

撫四夷之傷殘虜候爲虞戎師近警一言萬務裁成聖心得失謬於毫釐安危存於晷刻伏慮顧懷猶切神志未和衆情之所以不寧臣子之所宜兢悸伏願抑周喪之私痛均品物於至公下慰黔黎上安宗社天下幸甚

請增添聞奏條令疏

長慶三年十一月御史臺

伏以臺司奏報並有舊條昨因左巡奏疏闕已准勅科罰聞奏訖臣今檢尋條件本不該詳事須添改令可遵守伏請添一節文應諸司科決人致死雖不死而事異於常稍涉非理者並准前條聞奏禁域內不在此限庶得從今

以後免有闕遺

請罰到任遲延疏

寶曆元年九月御史臺

近日新置刺史赴官多違條限請准舊制不逾十日常參官及六品以下分司官比來淹延亦動經累月自今以後常參官分司請勅下後二十日發其六品以下分司官請待臺牒到發限外如妄稱事故不發常參官奏聽進止六品以下官臺司舉罰兩月俸料

請釐正託故不之任疏

寶曆二年二月

內外六品以下官有不之任諸色事故勾留等伏以任官

員數素定奉公無分有常一處闕人庶務失本法苟不舉
弊恐滋深今國計所須江淮是賴江淮州縣官俸料稍厚
處勾留倍多除准勅正額勒留人外有事故離任者每年
須部送兩稅左藏庫行綱不知處差常務例置以官糜費
因緣所害甚廣況勤勞責累移在他人俸祿資考則爲已
有欲將求於致理先是察其曠官伏請起今除元有勅額
勾留之司及宰相節度使幼小子弟恩例一官不之任外
縱有要籍並須具事由聞奏挾名勅下即任離本官任仍
當時牒報御史臺有違請免所居官并殿三選其州府長

史奏聽進止

請置祗候屋宇疏

寶曆二年三月御史臺

三院御史盡入到朝堂從前無止泊處今請置祗候屋宇門下直省院西京兆府尹院東有官地請准長慶元年八月於中書南給官地起造請度支給錢一千貫文臺司自勾當便從便起造

請推問臨決稱冤疏

太和元年十二月御史臺

伏以京城囚徒准勅科決者臣當司准舊例差御史一人監決如囚稱冤即收禁聞奏便令監決御史覆勘者伏慮

監決之時各懷疑憚務求省便難究冤辭恐至無告屈之人失陛下好生之理且臺司本定四推以讞疑獄六察職事已重不合分外領推伏請自今以後有囚稱冤者監察御史聞奏勅下後便配四推所冀獄無冤滯事得論理

請設官講明經義疏

天成四年十一月國子監

伏以國家開設庠序比要教授生徒所以日就月將知討論之不廢卜禘視學明考較之有程先生旣以親臨學士豈宜他適蓋以頃者監名雖補各以私便無常且居罔離羣則學能敬業終成孤陋誰爲琢磨但希託迹爲梯媒只

以多年爲次第罔思蟻術惟俟鶯遷忍淹違養之時徒積
觀光之歲今國家化被流沙漸海政敷有截無疆大扇素
風恢張至道是以重興數仞分設諸官教且有常業成無
忒而況時物甚賤館舍尤多諒無懸磬之虞足待撞鐘之
問但自學徒所好可以教亦隨機旣欲成名必須精業如
有好春秋者教之以屬辭比事三體五情尊王室而討不
庭昭沮勸而起新舊其所異同者則引之以二傳也如有
好禮者則教之以恭儉莊敬長幼尊卑言揖讓而知獻酬
明冠昏而重喪祭其所沿革者則證之以二禮也如有好

詩者則教之以溫柔敦厚辨之以草木蟲魚美盛德而刺
淫昏歌風雅而察正變如有好書者則教之以疏通知遠
釋之以訓詁典謨思帝德而敬王言稽古道而建皇極如
有好易者則教之以潔靜精微戒之以躁動競進體十翼
而分六爻應吉凶而先擬議也至於歷代子史備述變通
既屬異端誠非教本但以適當凝凍將近試期欲講小經
以消短景今已請尚書博士田畝講勘論語孝經行莫太
於事親道莫逾於務本如有京中諸官子弟及外道舉人
況四門博士趙著見講春秋若有聽人從其所欲顓俟放

勝別啟諸經既溫故而知新惜寸陰而輕尺璧顯經者若能口誦碩學者又得指歸自然縻好爵以當仁策科名而得俊幸不孤於選士冀有益於化風

請以壽星配社兩京立萬壽殿狀

開元二十四年七月

月令云八月日月會於壽星居列宿之長五者土之數以生爲大臣竊以壽者聖人之長也土者皇家之德也陛下首出壽星之次旅於土德之數示五運開元之期萬壽無疆之應請兩京各改一殿以萬壽爲名至千秋節會百寮於此殿如受元之禮每至八月社日配壽星祠至於大社

壇享之

奏兩監學生員額狀

元和二年
國子監

伏見天寶以前國館學生其數至多並有員額至永泰後
西監五百五十員東監近置一百員未定每館員額今謹
具定額如後伏請下禮部准額補置

請令常參官舉人自代及縣令犯罪坐舉主狀

元和

六年十月
中書門下

准建中元年勅常參官授上訖三日內上表讓一人以自
代者伏以人臣拜職皆有謝章晉太尉劉實著崇讓論請

因謝章便有所讓令主者掌此讓文類其被舉最多者有官闕據此選用如此則事不專於宰府材須選於衆人唐虞僉諧義實由此臣請自今常參官舉人後便選擇進其所舉人兼狀上中書門下如官闕要人先於所舉人中選擇進擬臣又聞周之羣僕委於伯冏漢之多士辟於有司故凡稱大寮皆得進善陛下念黎元之困設令長之科羣寮舉知四海蒙福然薦延相繼沮勸未行苟或容私則慮害政伏請所舉縣令到任後刑罰冤濫及有贓犯者其舉薦官削階及停見任書下考

奏得古釜狀

元和九年八月
中書門下

夏綏銀節度使今月八日因取土修城於西北角近倉掘得釜大小共計二百五十四並容六斛以下五斛以上俱無破損如新器物者伏以人天所資粒食爲本錡釜之用火化是因今大軍方興此物自出則知向時藏瘞蓋神誘其衷今之彰呈豈天有所助聖作物感一何昭然望付史館

奏姚中立高錯考試狀

太和三年三月
御史臺

據吏部分察姚中立稱准勅考試別頭進士明經等官考

功員外郎高鐸考試禮部關送到進士鄭齊之李景素兩人明經王淑等十八人並及第放榜之後羣議沸騰職當分察不敢緘默及得高鐸狀伏以進士明經並先無格限其所送進士二人文藝並堪與及第明經比年所送不過三五人今年禮部關送十一人及考試帖義十一人並堪與及第

奏鄧琬等禁繫狀

太和五年十月度支

據屯田郎中唐扶鄧州內鄉行市黃潤兩場倉督鄧琬等先主掌貞元二年湖南江南運到糙米至浙江於荒野中

權造國盛貯差鄧琬等交領除支用外六千九百四十五石多年壞爛已成灰塵准度支牒徵原主掌所由從貞元二十年以後所由鄧琬父子兄弟至元孫相承禁繫經今二十八年前後禁死九人追孫及元孫等四人見枷禁

奏酌量增減諸司食利錢狀

會昌元年六月戶部

准正月九日敕文放免諸司食利錢每年別賜錢三萬貫文充諸司公用今准赦文酌量閑劇率配如後准長慶三年十二月九日勅賜諸司食利本錢共八萬四千五百貫文四分收利一年祇當四萬九百九十二貫文今據赦文

所賜錢三萬貫文若據舊數率配即欠一萬九百九十二貫不足今請落下徵錢驅使官每貫二百文課並更請於合給錢內四分中落一分均攤分配長慶三年得新賜錢三十二司外更有剩錢五百四貫八百文使將此錢均給東都臺省等一十四司祇用新賜錢三萬貫文並得充足諸司雖落下一分錢緣置驅使官員於人戶上徵錢皆被延引或人逃散失落常不得足雖有四分收利之名而無三分得利之實今新賜錢入日便請更無懸欠用即可足繁劇司比有官錢出放欠亦優用本錢今既無本錢支料

須足伏緣中書門下公事不同諸司恐不可落下一分及徵錢人課今請每月並舊錢添至三百貫文其御史臺頻得報牒稱本錢數多支用處廣雖有諸道贓罰公用常不充足今請每月合得利錢數外每月更添至三百貫文內侍省據自司報牒稱省內公用稍廣利錢比於諸司最多今請於合得錢外亦添至三百貫文兵部吏部尚書等銓一十一司緣有舊本錢准勅放免又有公事今請每月共與一百五十貫文并中書門下御史臺及兵吏部諸銓每年共當六千八百二十九貫六百文伏緣三萬貫文均給

諸司已盡臣今於新賜外更請添賜上件錢所費不廣所利至多則內外諸司永得優足伏望聖恩允臣所奏其諸司分配賜錢若據諸司牒報見收利多少分配或以人戶逃散經恩放免見在本錢所存無幾其間有三五司自方圓致本數即稍多事例不同難於均一人吏得以欺隱實數不可交尋今請依長慶三年十二月九日均賜錢勅額分配新賜錢三萬貫事有根柢亦得均平酌量閑劇皆有所據其逐日錢數多少續具子細分析聞奏

條奏鹽法狀

大中元年閏三月鹽鐵使

據兩池權鹽使狀應舊鹽法勅條內有事節未該及准去年赦文合再論理事件等一曰准貞元元和年勅如有姦人損壞壕籬及放火延燒捉賊不獲本令合當殿罰皆已有條制今見施行但未該地界所繇及無捉賊期限伏以鹽池提禁只仰壕籬如有放火延燒故損壞本縣分一周年內十月度同捉得五斗以上私鹽先准元和十二年六月三日勅與減一選即所酬殊寡難使盡心若必遣縣令須令賞罰相稱伏請從今以後其縣本界內若五度捉得私鹽每度捉得一斗以上兼賊同得者不限歲內歲外但

數足後即與減一選如累捉得亦請累減減至三選即止如是別色現任正官員前官差攝縣令亦准正縣令處分如是散試官差攝縣令無選可減者亦得年五度捉得私鹽并賊同得者即請別賞見錢五十貫累捉得亦請累賞如兩畿令及赤縣令無選可減者在任之日但界內捉得私鹽件數與勅文相當檢勘別無異同即請申中書門下秩滿後便與依資除官如此則必悉心奉法不失罪人其餘即請各准元勅處分一曰應捉獲越界私鹽并刮齮盜兩池鹽賊與劫奪犯鹽囚徒頭首關連人等推勘是合抵

死刑者承前並各准元勅極法處分者伏以本制鹽法束勒甚嚴近年以來稍加寬令又准會昌六年五月五日赦文靈武振武天德三城封部之內皆有良田緣無居人遂絕耕種自今以後天下囚徒各處死刑情非巨蠹者特許全生并家口配流強盜鹽賊蹤入界各許本州界一月內捉賊送使如過限不到即是私存慢易搜索未精其元勅內所罰縣令課科便請准勅文牒本州府當日據數徵剋送使又弓矢射所繇等晝夜只於池內檢巡其壕籬外面山林掩映村柵相次每有姦人興心結構必須與村人相

熟乃敢下手若或無人勾致即遠賊不敢自來亦緣從來未立科條以此沿池所由都無稟東伏請從今後如有姦人損動壕籬及放火延燒并有盜竊蹤跡其地界保社所繇村正居停主人等如有自擒捉得賊每捉得賊一人推勘得實所捉人當日以官中諸色見錢一十貫文充賞如漏網及不覺察到並請追就便各決脊杖十五如推勘與賊知情即請准所犯人條例處分如是所繇及別色人等捉得亦請准前給賞其餘並請各准元勅處分一曰諸州府應捉搦販賣私鹽及刮鱗煎賊等伏請前後勅節文本

界縣令如一周年內十度同捉獲私鹽五斗已上者本縣令減一選如每年如此即與累減者伏以私鹽厚利煎竊者多巡院弓矢力微州縣人烟遼闊若非本界縣令同立隄防煎販之徒無繇止絕其縣令本界漏網私鹽據石斗各有元勅並請依舊條處分如縣令若侍本此三道者當時應緣鹽法捉獲前件賊等並是固違勅文挾持弓刀棒杖皆非殺人調致巨蠹兇惡情狀難原如或詐有生全則必欺偷轉甚別無其法可以畏之今伏請捉獲此色賊推勘得實合寘極刑者並請各准奏處分以前戶部侍郎判

度支盧宏正奏臣又得兩池權茶使檢較司封郎中兼侍御史司空輿狀自領職以來披尋捉鹽條制其間有此三節須重奏論伏以鹽法條制須是嚴刑稍似寬容則姦人無懼招收權課數闕伏望聖慈許依司空輿所請即冀私鹽杜絕權課增加

立二王三恪狀

開平二年十二月南郊禮儀使

詩稱有客書載虞賓實因禪代之初必行興繼之命俾之助祭式表推恩兼垂恪敬之文別示優崇之典徵於歷代襲用舊章謹按唐朝以後魏元氏子孫韓國公爲三恪以

周宇文氏子孫爲介國公隋朝楊氏子孫爲鄴國公爲二王後今伏以國家受禪封唐朝子孫李從爲萊國公今參詳合以介國公爲三恪鄴國公萊國公爲二王後

覆論周知微奏狀

長興二年四月
中書省

周知微踐揚華省獻納明廷所貢讜言深符治道蓋慮細微之物便爲賂賄之名遂致刑章過行深刻須知撙節務守廉隅或是監臨之司或因公事之際凡關取與便涉阿私物若顯屬貨財並宜爲賂罪其餘不是監臨不因公事不在此限應推斷科條不得有違格律

奏忌辰前後日不坐朝狀

清泰元年十一月
月中書門下

二十六日明宗忌羣臣奉慰行香固有常禮恭以陛下初遇忌辰合存降殺仰惟追感難抑孝思固於茲時不同常歲臣等商量請於忌辰前後各一日不坐

奏請避諱狀

天福三年二
月中書門下

禮經云禮不諱嫌名二名不偏諱注云嫌名謂音相近若禹與雨邱與區也二名不偏諱謂孔子之母名徵在言在不稱徵言徵不稱在此古禮也唐太宗二名並諱元宗二名亦同人姓與國諱音聲相近是嫌名者亦改姓氏與古

禮有異廟諱平聲字即不諱餘三聲諱側聲不諱平聲字
所諱字玉文及偏旁闕點畫望依令式施行

奏李自倫孝義狀

天福四年
正月戶部

深州司功參軍李自倫六世義居奉勅准格處分按格勅
節文孝義旌表苟存虛濫不可褒稱必在累世同居一門
和睦尊卑有序財食無私遐邇欽承鄉閭推伏州縣親加
按驗狀迹殊尤簡覆既同准令申舉方得旌表當司當本
州審到鄉老呈言等自倫高祖訓訓生燦燦生財財生忠
忠生自倫自倫生光厚六從弟兄同居不妄

奏定高祖郊壇配坐狀

天福七年十月
中書門下

太常禮院狀申高祖十二月二十日祔饗於太廟禮畢令
定逐年四季郊壇配坐准禮例逐年勘造祠祭晝日及編
附令式伏請奏聞宣下者靖祖孝安皇帝配冬至祀昊天
上帝

請量留太谷令李殷狀

天福
間

殷釐務公廉以德化下獄無囚繫刑無鞭撻薪水之事不
擾於民力賦輿之數不失於公程三時勸農躬行田井乾
餽曝皸裹行而食一邑熙熙長幼有序流者歸復如戀父

母今考秩垂滿衆情願留敢希明恩重令治任

張嗣宗不受代狀

開運二年
開封府

嗣宗先被百姓趙覺直論訟不公法寺定罪合徒一年半
以官收贖贖銅三十斤府司尋科放訖據新除襄邑令王
允昇狀申稱張嗣宗不肯交割縣務稱未考滿者

除宰相劉昫兼判三司擬狀

伏以劉昫經國才高正君志切方屬體元之運實資謀始
之規宜注宸衷委司判計漸期富庶永贊聖明臣等商量
望授依前中書侍郎兼吏部尚書同中書門下平章事充

集賢殿大學士兼判三司散官勲封如故未審可否如蒙
允許望付翰林降制處分謹錄奏聞

投宰相牋

方今兵寇在興民力凋弊所望明公弼成大化彌綸紀綱
舉賢任能以光庶事俾萬物各得其理百姓日用不知損
不急之官杜私門之請如此則刑清俗富天下自無窮人
不宜專政廟堂方行小惠昔子產以已車濟人於溱洧君
子謂不知爲政不如以時修橋梁惟明公察焉